

**PESALAH MUDA DI MAHKAMAH SYARIAH: SATU TINJAUAN TERHADAP
PENGHUKUMAN MENURUT PERUNTUKAN UNDANG-UNDANG SYARIAH
DAN MAQASID AL SYARI'AH**

Mohd Abu Hassan bin Abdullah

Jabatan Kehakiman Syariah Negeri Sabah

mahba@esyariah.gov.my

ABSTRAK

Seksyen 2, Akta Tatacara Jenayah Syariah (Wilayah-Wilayah Persekutuan) 1997 (Akta 560) mentafsirkan pesalah muda sebagai pesalah yang berumur lebih sepuluh tahun dan di bawah enam belas tahun. Pesalah-pesalah muda yang disabitkan ini akan dihukum dengan hukuman sebagaimana yang telah diperuntukkan oleh akta atau enakmen syariah di Malaysia. Objektif kajian ini untuk melihat kepada penghukuman yang dijatuhkan oleh mahkamah syariah terhadap pesalah muda berdasarkan peruntukan undang-undang yang digunakan. Dalam pada itu, kajian ini juga mengenalpasti masalah yang sedia ada melibatkan penghukuman ke atas pesalah tersebut. Selain itu, kajian ini juga melihat kesesuaian hukuman tersebut sebagaimana yang ditetapkan oleh prinsip syariah terutamanya menurut *Maqasid al Syari'ah*. Metodologi kajian yang digunakan dalam kajian ini adalah kajian empirikal yang dikupas dalam kerangka kualitatif. Metodologi kajian perpustakaan digunakan yang mana metodologi-metodologi analisis kandungan dan analisis kritis dilaksanakan ke atas buku, artikel serta laporan kes berkaitan isu hukuman alternatif terhadap pesalah muda dari perspektif undang-undang syariah dan *Maqasid al Syari'ah*. Hasil kajian mendapati ketiadaan penyelarasan dan penyeragaman dalam isu hukuman alternatif yang boleh dianggap setimpal dan bersesuaian untuk dikenakan ke atas pesalah muda yang telah disabitkan. Akhirnya, kajian ini mencadangkan agar peruntukan undang-undang syariah yang digunakan dan prinsip *Maqasid al Syari'ah* diselaraskan serta diseragamkan dalam isu hukuman alternatif yang setimpal dan bersesuaian bagi pesalah muda. Ini penting bagi memastikan hukuman yang bakal dikenakan bersifat pemulihan bukan bertujuan pembalasan semata-mata seperti pesalah dewasa.

Kata Kunci: Pesalah muda; Hukuman; Prinsip syariah; *Maqasid al Syari'ah*; Pemulihan.